


Envez di haya fam di tata...

Na Aruba tin mas caso di yiunan cu a haya fam di Mama



ORANJESTAD(AAN): E sentencia cu Corte den Prome Instancia di Aruba a tuma recientemente no ta e prome caso relaciona cu e asunto di fam pa yiu. Den e sentencia Corte a tene cuenta cu un sentencia di Corte Comun di Caribe Hulandes di dia 24 di mei 2016 caba den cual e Hues ya a permiti un tata reconoce su yiu, cri'e pero no por obliga e mama pa duna e yiu fam di e tata. E caso ey tabata un caso di Aruba, den cual mayornan a lucha pa fam di e criatura te na Corte Superior!

Henter e discusion ta basa riba e hecho cu Aruba ainda no tin fin di modernisa nos codigo civil. Algun luna pasa a pasa e cambionan, incluyendo e famoso amienda pa parehanan di mesun sexo, pero e ley pa introduccion di e cambionan nunca a yega Parlamento. Esey ta haci cu ainda e codigo civil bieu ta na vigor.

Den e codigo civil existente ta stipula cu asina un tata reconoce un yiu, cu automaticamente e ta carga su fam. Den e cambionan acepta den e codigo civil nobo, e mayornan por dicidi di uza fam di e tata, fam di e mama of te hasta un combinacion di ambos. E problema ta cu ainda Parlamento no a laga sa kico ta e ultimo cambionan basa riba mocionnan y amiendanan presente durante e reunion di Parlamento. Esaki pasobra e prome "draft" di e ley di nomber tabata duna 32 posibilidad di combinacion, di forma cu por uza fam di mama, tata, wela, welo y asina por sigui menciona.

E reto cu nos na Aruba a confronta pa hopi aña tabata e fam di Latinonan. Nan ta carga

dos fam y ora nan yiu nace na Aruba, nan ta sigui cu e dos famnan y ora nan bay casa, e ora e ta bira 3 fam. Hopi hende a cuminsa reclama y demanda pa nan carga un solo fam. Tambe tabatin e mamanan cu tabata keha cu nan no por duna nan yiu nan fam. E dos retonan ey mester a soluciona, pero ta parce cu Parlamento y e departamento Huridico di Gobierno a bay "inventar" e wiel di nobo y a habri un sin fin di posibilidad y opcion pa combinacion, manera por ehempel combinacion di fam di tata Latino (cu ya tin 2 fam) cu e fam di e mama, haciendo cu e mucha lo carga 3 fam y ora e casa e lo tin 4 fam tras di su nomber!

Den e proposicion di cambio di ley di nomber ta bisa si cu no por ta asina cu un yiu ta carga fam di su tata y e otro di su mama. Ora haya e prome yiu di e pareha, e mayornan mester dicidi cu si e mucha ta carga fam di e tata, e mama of un combinacion y consecuentemente tur otro

yiunan cu nace di e pareha ey lo carga e mesun fam!

E tipo di retonan aki awor ainda ta un poco misterioso pasobra ningun instancia no a sali bisa kico tabata e ultimo version di cambionan presenta y aproba den Parlamento di Aruba algun luna pasa.

E realidad ta cu Aruba y islanan BES ta e unico paisnan cu no a renoba e ley di nomber den nos codigo civil, pasobra tanto Hulanda, Corsou y Sint Maarten si a haci tur e cambionan aki caba y a soluciona tur e retonan cu tabatin pa cu e forma di atende cu fam pa yiunan.

Mester menciona cu desde e sentencia di Corte Comun di Caribe Hulandes na Mei 2016, ya e Hues a dicta caba cu e ley di Aruba ta discriminatorio pa e hende muhe y cu e ley ta empugna cu nos constitucion y 3 tratado firma internacionalmente. Mas leu ainda, mas o menos 27 aña pasa caba Hoge Raad na Hulanda a trata un caso similar y di e tempo ey caba a papia di un ley discriminatorio pa hende muhe. Pero e tempo ey Hoge Raad a considera cu ta for di e autoridad di e Hues pa bay haci e cambio. Pero, como cu 27 aña a transcuri y Parlamento nunca a haya ta bon pa corigir e ley aki, a pone cu otro Huesnan ta mira e situacion diferente y ta aplica ley na un otro forma.

Esey mes ta e causa cu desde aña pasa Corte di Aruba a cuminsa aplica e ley di tal forma cu ta permiti un tata pa reconoce su yiu, cria su yiu pero ta kita e derecho automatico cu e yiu mester carga su fam. Claro cada caso ta diferente, pero ya ta dos caso caba cu un Magistrado ta duna mama rason pa e yiu carga su fam.